

## Brudale Jugend!

Onser Jugend wird jo emmer brudaler. Des fängt ja scho em Grundschulalter a – des isch arg schlemm.

Der Mesmer hot dia Dag 's Krippe en dr Kirch' ufbaut. Alles richtig schee: da Schdall, Oggs ond Esel, Maria ond Josef – bloß 's Chrischtkendle hot nadierlich no gfehlt. Des kommt jo erscht am Hoiliga Obend drzua.

Wia dr Pfarrer am näggschda Morga en d' Kirch kommt, fehlt z' mol dr Heilige Josef. Sofort stellt er da Mesmer zur Rede, ob er net alles odentlich ufbaut häb? Doch, doch, er häb alles no'grichtet.

Am näggschda Dag fehlt au no dia Mutter Gottes. Dr Pfarrer isch en völliger Auflösung begriffa ond zitiert sein Mesmer zu sich. Zamma suacha se de ganz Kirch aus. En alle Winkel, ondr alle Kirchabänk', en dr Sakristei, uf dr Kanzel ond hentr dr Orgel. Nirgends isch des Heilige Paar zom fenda. Se verzwarzlat schier.



Jetzt inschpizierat se dui Krippe nomol. Ond ondr dem Tisch, wo dia Krippe druf stoht, fendat se en Zettel:

*Liebes Christkind,  
ich winsche mir fir Weihnachten ein neies Fahrrad, ein baar Schi mit allem Zubehör, eine neue Schderioanlage und ein Schlagzeug: Sollte ich wider Erwarten eines dieser Dinge nicht bekommen, siescht Du Deine Eltern nie mehr!*

Bis näggschd Woch'

Ihr

Wulf Wager